

## Cussagl da cumün

Protocol nr. 2 da ls sezzüda dals 16 favrer 2010

### **Tempo 30 in cumün**

Fin uossa ha il cumün tut a fit dal cumün da Scuol l'apparat chi muossa la sveltezza dals automobilists. Il cumün d'Ardez ha dumondà ün'offerta per ün apparat nouv. Quel dess gnir cumprà dals trais cumüns Ardez, Tarasp e Ftan. Il Cussagl e decida da's partecipar cun ün terz vi dals cuosts, voul dir fr. 2'955.--.

### **Ordinaziun da multas disciplinas**

Armon Lehner, respunsabel per la pulizia survain l'incumbenza da parderdscher in-sembel culla pulizia chantunala ün sböz per ün'ordinaziun da multas disciplinas.

### **Reto Stuppan, lavuors da transfuormaziun**

Sar Reto Stuppan survain il permiss per las lavuors da transfuormaziun dal palantschin da sia chasa nr. 3 in Munt Fallun (parcella nr. 290). Illas alas vers süd e vers nord vegnan construidas duos lucarnas.

### **Guntern N. e Sivertsen O. K., access parcella nr. 2727 in Fionas**

Ils patrums da fabrica da la parcella nr. 2727 nempe Nicole Guntern ed Odd Kare Sivertsen dumondan per far l'access per lur chasa davent da la via da quartier suot da Fionas. In quist möd po gnir piazzada la garascha main marcant illa cuntrada. Il schef da fabrica ha scleri la chosa. Las prescripziuns dal plan da quartier Fionas nun excludan quai. Perquai decida il Cussagl dad agradir a la dumonda e da laschar far l'access suot (a la fin dal marchapè pro la s-chala da metal da las Pendicularas). Ils cuosts d'infrastructura han da gnir pajats tenor la clav da scumpart valabla.

### **Spreiter Hans ed Astrid, entrada**

Ils conjugals Spreiter han fabricà lur chasa illa parcella nr. 2696 in Val Forada. Tenor la decisiun dal Cussagl da cumün dals 17 marz 2009 han els survgni il permiss per far l'entrada al nord vest da lur parcella. Uossa davopro fan els la dumonda per revgnir sülla decisiun dals 17 marz 2009 e da laschar far l'entrada al nord da la parcella. Il Cussagl nun es pront da revgnir sülla decisiun e quai our dal seguaint motiv: Las piazzas da parcar pro l'entrada da la scoula vegnan levadas. Las piazzas chi mancan vegnan s-chaffidas güsta in quel lö ch'els vulessan lur entrada.

### **Masüraziun uffiziala, plan „terrain in boudas“**

In basa a la ledscha federala davart ils drets reals d'immobiglias es il cumün in dovair da definir ils cuntegns cun spostamaints permanents da terrain. Las parcelas pertoccas vegnan inscrites i'l register funsil sco restricziun da la proprietà tenor il dret public. Il geometer ha elavurà ün plan cul perimeter pertoc. I's tratta da tuot il territori al vest da l'aua da Val Forada fin sün Futscharai e da la davent vers ost fin Fivench. La part da Ftan Pitschen nun es i'l perimeter dal terrain in boudas. Ils proprietaris da terrain han il dret d'üna nouva fixaziun scha'ls cunfins s'han spostats incunvgnaintamaing pervi dal spostamaint da terrain.

Il Cussagl approvescha il plan „terrain in boudas“.

Il capo: sig. Reto Pedotti

L'actuar: sig. Andri Florineth